

香蘇山館古體詩鈔卷四

百歲張節婦詩

謂妾無夫妾有夫六載恩愛誓不渝謂妾有夫妾無夫七十九
年形影孤天南地北音信無妾身圍閣心江湖青裙白髮涕泪
枯妾身冰雪心蓼荼嫁夫年十五一女癯癯伴孤苦待夫至百
齡夫竟不歸曰不瞑苦節上壽皆可傳旌典不得邀生前一杯
黃土埋寒煙有姪能文銘厥阡調蔡東我詩合共貞砥鐫女貞
一樹青參天

補題蔣心餘先生攜二子游廬山圖卽送師退之桂林

青芙蓉插白雲出天與先生作詩骨偶然憑眺亦千載屐齒蒼
苔肯埋沒從游况有大小蘇笠檐高下筇枝扶松風瀑雨答清

香蘇山館古體詩鈔卷四

響一字濺落千明珠此畫成後八九年吳生始泊潯陽船五老
峯頭華月吐涼夢夜照潭玉淵此詩傳和欲千首吳生始載藏
園酒老梅花下拜涪翁許與諸郎爲石友騎鯨一去雲海空吾
儕聚散如秋蓬名小山住尙難必何況樂與天倫同翦鐙夜讀
斜川集江館開簾嵐翠濕墨痕慘澹對三更山鬼詩仙皆飲泣
仲兒書到薊門秋君去灘江又買舟雲泉且與開懷抱莫更看
山愴昔遊

題譚七子受

光祜

兒女英雄圖舊照兼呈君農

光祥

驚沙捲地霜草枯陣雲如幕圍穹廬天馬蹀躞鞭珊瑚牙旗一
丈風舒舒金樽灑艷翠袖扶馬前艷絕雙名姝紅綃作妓崑崙
奴譚生意氣天下無我與譚生七年別肝膽向誰傾熱血飽看
江南萬樹花蓬門歸掩蘇山雪富貴神仙願未成酒酣俠氣猶

香蘇山館
東鄉
吳嵩梁
蘭雪
天體詩
大清
庚子
春
月
四
日
制
書
畫
堂
藏

縱橫扁舟來聽章門雨鐵笛重吹塞上聲吾儕磊落真男子萬里功名年少始肯將駿骨換黃金要令蛾眉附青史憂患頻年閱漸深贈君寶劍更沈吟封侯亦是尋常事莫負平生學道心

又題鐵簫乞食圖

烏金尺八涼於水蓮花吹落秋江裏美人駿馬佳公子落魄相逢竟如此吳市鶯花閱幾春舊曾遊處我傷神西華葛帳淮陰飯一樣天涯失路人

酬李晴雪

宗濤

畫竹兼寄尊甫韋廬丈

君懷此君軒池邊好修竹浣筆畫清湘枝枝映寒淥雨餘筠粉香展卷秋意足想見澹宕人臨流結詩屋

我有石溪館秋筍高於林雲水成一碧蕭然生畫陰愛此畫中枝卧影同清深詩就寄溪上爲寫平生心

題萬仞岡小像兼謝作石溪詩意圖

香蘇山館古體詩鈔卷四

二

輞岡畫手高無敵曳裾不願王門客歸卧濂溪舊草堂湖山跌宕狂猶昔梅顛新句瘦難勝寫意惟君筆妙能更五百年知此夕萬花凍合一溪水

新建陸遠亭明府出其大文歸田讀書圖屬題

江田負郭松園屋插架縹緗盡經讀高雲爲雨不歸山溪影倒涵秋樹綠先生作官閩嶠邊手種枕榔半插天荔支飽啖亦快意終愛蓴鱸一味鮮片帆歸翦吳淞水三徑荒蕪重料理猿雀相將逐主人幽花瘦竹都歡喜秧針如繡田水平牛笛緩緩煙中行腰鎌映雪紅稻熟村酒可釀蔬可羹落葉疑雨天有星殘編入手粘枯螢誦聲夜半撼林末寒缸依舊兒時青高貴尋常真脫疑高格如今能有幾一篇循吏授文孫千首新詩傳甫里

我家舊館在香蘇負米年年感索居歸耕有約期終踐門掩梅花自讀書

題萬五廩山誌纓圖

書生早負封侯骨濟南終童今再出白麟對後請長纓才子英雄俱第一君作此圖年十五劍氣如龍已騰擲副車誤中樽恨椎去謁將軍但長揖荆蠻小醜敢跳梁大帥旌旗兩湖集君來幕府啟蓮花玉立長身映金戟營門夜掩山月高萬馬無聲看艸檄奇兵間道解重圍輕騎宵行斬渠賊但誇書記是奇才誰信軍諮能料敵

天威計日掃欃槍銅柱千年銘戰績功成不肯畫雲臺來判江南五花筆酒酣告我淚沾衣知己平生姜與畢度香秋帆兩制府二十年前兩少年嗟我與君皆丙戌君今作吏我計偕壯志蹉跎踰

香蘇山館古懺寺鈔卷四

三

三十丈夫經世有實用詎肯甘心老篇帙勸君早種幕門松努力且供縣官職三吳財賦甲天下百萬蒼生需緩急兵農從古政相通綜理要當無事日漢家將相守令多絕代勳名能自必邊兒不識棄繻生請看此圖先屈膝

又題雪夢圖

千花萬蕊凍成雪花裏玲瓏見明月衝寒特換五銖衣人影梅魂都豔絕梅顛風味共平生重展冰綃恰有情生愁綠鳳嬌啼早今夜羅浮夢欲成

題張古漁

敦仁

郡丞攜二子游廬山圖

廬山之雲白成海廬山之松青刺天青松白雲往往互出沒奔流萬仞直下九疊屏風前先生踏雲來五老手俱抗從以兩鳳雛左筮右筇杖雷霆戰苦冰雪寒怒濤勢欲浮千山松邊覓句

水邊坐雲意詩意同一閒匡君別我十七年塵土汨沒人事牽
名山咫尺有約不能赴半江空翠夢泊潯陽船先生山中歸示
我紀游卷綵臺飛擲萬芙蓉倒捲銀河入詩硯我慙且妬誦不
休化工乃爾窮雕鏤徑思蠟屐追前游病雀一放江天秋下視
彭蠡真淨漚三峽礧前萬松樹雲陰容我結茅住但覓先生聽
泉處

李晴雪試馬圖

龍媒八尺毛骨殊錦鞍玉轡鞭珊瑚李郎愛此性命俱霜蹄一
蹴萬里無我如病馬伏櫪久甘與鶩駘共升斗孫陽晚遇亦蹉
跎駿骨千金復何有單騎衝寒指鳳城酒酣讀畫眼先明杏花
三月紅成海待汝天街並轡行

孟春初二日入都

香蘇山館古體詩鈔卷四

四

前日守殘歲昨日迎初春團園酒一盃今朝餞行人行人路久
諳所畏非關津內顧增隱憂迴腸轉車輪
吾母體素孱旨甘况多缺卧病今始蘇頭白愈成雪望兒貽令
名強歡慰新別暗中神恐傷仰觀淚承睫

有婦亦中年持家多苦顏連宵治行裝盡質釵與環勸我當速
行望我當早還馬蹄一尺塵閨夢千重山

三姪皆少孤讀書多未成教養苟不勤九原愧吾兄我生惟四
女婉變如雛鶯臨行牽我衣亦覺難爲情

及門有陶生忠其才亦雛鳳早唼霜哺篇幸入玉堂貢風雪從

斯遊舟車我能共傷哉寢邱人負薪有餘痛生爲節母梅孺人
之子廉吏陶公金

諸之

晴雪在庭樹鵲語何楂楂謂我此行利先期當報家我心反哺

同羽毛悴天涯願汝傳好音春風簪杏花

自書古唐官硯詩後呈漕帥鐵冶亭先生

吳生琢句如琢硯一字工夫經百鍊惜哉不令鐵公見鐵公愛硯如愛才片石價重黃金臺惜哉不遇吳生來此硯歸公今得所不然棄擲終塵土吳生潦倒二十年賀硯以詩心獨苦東風一權凌黃河墨花怒捲千層波自攜新句擲公袖識公不早真蹉跎公能擊節吳生歌此詩此硯今無多嗚呼此詩此硯今無多生不逢公當奈何

詩龕移竹圖爲法時帆

式善侍講作

霽堂

繆中翰炳泰

畫人如畫竹一生骨韻無由俗夢禪

吳布衣畫竹

如畫人千枝萬葉同清真主人愛竹復愛詩身與詩龕作住持龕中移種竹千枝日在畫中人不知詩龕近在慈恩寺便是西

香蘇山館詩話卷四

五

涯移竹地石田老筆已荒寒此畫蕭然得詩意竹性只愛湘江幽移種長安非所求灌以玉泉此君醉詩龕一雨成新秋擔頭日日人賣花碧桃紅杏爭繁華主人高卧看修竹門外忙殺游春車我來同拜茶陵墓歸就主人移榻住笱衣脫盡粉猶多風香吹透湖邊樹故鄉亭館亦蕭森手植年來半出林昨夢尋詩攜舊侶水雲綠遍柘溪陰

下第後用歐陽文忠公集中韻呈少農戴蓮士師

薊之北阻江之西鄉心已赴身猶稽廿年蹭蹬期一騁鹽車失勢哀霜蹄同學後先接高第盛年意氣干雲霓俊鶻摩空縱奇翻秋蛩向夕聞酸嘶撐腸萬卷愧何有到眼五色非終迷玉堂修史熱紅燭書生守分甘黃齏所憂薄養乏升斗敢因困辱嗟塗泥先生德望冠臺省絳霄千仞升無梯却愛飢寒出新句欲

窮幽怪然靈犀病鶴肯分清俸飼驚鳥仍借高枝棲百年富貴
一彈指女蘿上琪喬松齊才華冠古不經世何異舞鏡矜山雞
遭逢縱快鯉燒尾老大已笑楊生稊香蘇山下我所宅湖光十
頃浮玻璃風塵暫作計借客骨肉動是經年啖村居絕妙入圖
畫騎牛安穩勝驂驪稻田一雨高下綠水聲入碓花連畦北窗
高卧看山色芒屨未用勞攀躋衰親兩鬢早成雪花前拄杖須
親攜酬恩無計但感泣歸耕有約先扶犁

禮烈親王克勒馬歌二首國初禮烈親王有良馬曰克勒

猶漢言棗騮也順治朝汪編修璠爲作傳今禮王汲修

主人屬張檢討問陶爲補圖馬高七尺長丈有咫耳際

肉角寸許腹下旋毛若鱗甲然在軍中每聞鼓聲奮迅

欲出嘗乘至安平適病蹄自跑土出泉洗其創而愈今

香蘇山館古體詩鈔卷四

六

有聖水泉王薨馬聞哭聲哀鳴否采幾遂斃比奉天歲
取馬至王猶問孰爲克勒馬種必善飼之嵩梁嘉其有
古烈士之風因作是詩附書圖後

長白山高江水黑天遣神駒歸貝勒諸將逡巡不敢騎渾身血
汗桃花色頭角嶄然鱗甲動始信天龍有真種生立功名死報
恩畫中見汝猶神勇吉林岡連薩爾濟巨礮驚雷箭如雨霜蹄
奮蹴陣雲飛二十萬兵殲一鼓辛苦身經百戰場日跑泉水洗
金瘡路人今日尋靈蹟一掬春波映夕陽

烈王勲德史有傳天馬今從畫中見百戰歸來汗血流論功馬
亦當封侯王師破陣如破竹王來騎馬如騎龍四蹄雷電雙耳
風但聞戰鼓先騰空跨山幕礮若平地豈知身在重圍中箭傷
刀斫不能死得意騰驥日千里王歸天上馬人間矯首蒼雲淚

如水功成身殞為酬恩刻石昭陵未足論遼海年年千騎出王孫猶問舊龍孫

夏至日同法梧門侍講式善吳穀人祭酒錫麒謝香泉禮

部振定戴金溪刑部敦元張船山檢討問陶楊蓉裳員

外芳燥吳玉松編修雲吳山尊編修兼蔡浣霞禮部鑿

揚李虎觀戶部那燮譚蘭楣禮部光祥陳石士庶常用

光陳玉方刑部希祖李春湖學士宗瀚蔣師退大令知

讓胡香海大令森黃賁生大令郁章陳雲伯孝廉文述

郭厚庵明經莖姚春木上舍椿集春雲書屋分韻得為

字

深院不知午青藤陰四垂蟬聲一何新風過鄰樹枝盍簪及清暇林館洵所宜停尊竚涼雨天末雲漸移兩君詠皇華使節已

香蘇山館古體詩鈔卷四 七

先持黔山湘水間嘉會懷初離是日命典試官玉我非經

世才百事無可為寄託在文翰醉墨供酣嬉幸諧素心人愛我

客不羈一卷抱冰雪願與平生期

徐貞女詩長洲管錫齡聘室

女兒十六花一枝入門但著白麻衣郎生未嫁死始歸月照空

房霜入幃夢中郎來妾不知百年甘守聘一絲殷勤為郎奉翁

姥即在黃泉莫心苦妾死為郎墳上土

穀人祭酒招集有正味齋分詠得許道寧夏雲欲雨圖

微雨欲來山閣暝白雲收盡中峯影涼翠濛濛透葛衣一枕風

泉夢初車聲門外即紅塵畫裏何緣著此身平生愛服清涼

散去訪河間賣藥人

六月十二日山尊編修招集藤花書屋拜黃文節公像

天爲江西闈詩派生此倚天挂地筆一枝我恨公生太早不我
識夢公授我退聽堂中詩十一年前見公像質以所夢了不疑
後生可笑不自量辦香徑欲從公私是日祀公南昌之使院篆
烟縹緲清笙吹使者自稱公弟子肅肅前拜諸生隨三家注本
侵版告初蔽公之精神面目凜然如生時乾隆庚戌事江西舊
注全本翁覃谿師時方督學命同人按刊使院無任淵史容季温三
并公裔孫營所著年譜及鄱陽許尹序皆全聚散不可必得
失心自知一聲鶴唳別秋渚萍蓬豈得常相依今年值辛酉人
才萃京師爲公作生日頗憶南昌時上溯元豐之四載俯仰今
昔含餘悲公時改官太和令飽噉陳家新荔支其年長我僅一
歲元豐辛酉公抗懷已作千秋期石牛洞口山谷寺去年十月
年二十有七先有題楸詩嗚呼我公論文質厚以爲本又云詩非苦思不可
爲要從至性發神采但求曹劉李杜皆毛皮沉憂百鍊出奇警

香蘇山館言體詩鈔卷四

八

一字落紙山不移想見宜州戍樓大風雨飢凍日日撚吟髭公
詩自道痛至骨世上但賞瓊瑤詞用公浯溪禪詩句平生游蹟刻不盡
今日有祠兼有碑涪翁以自號別駕人所思此外黔安居土八
桂老人不復知爲誰只有山谷得名早至今皖公蒼翠疑露衣
山川顯晦亦有幸不幸何況文章風節萬古垂我謂公之魂魄
定不死游戲人海或者驟雲螭不然公生修水死於宜始終乙
酉同一炊距今七百五十有六載我輩安能壽以花前卮

書傳忠毅公遺墨後名宏烈南昌人國史有傳

慶陽告變賊切齒

詔徙梧州臣不死廣西失守官乞降殺城臣當爲厲鬼怒挾江
濤行十里神蛟暗掖忠臣起投身賊中賊不知乃入虎穴探虎
子馳書欲撫孫延齡廣西將軍握臂深交尙可喜平南韶州斬獲復

潯州義勇五千臣一體官階肯負大將軍臣本江西布衣土馬
雄之叛臣家亡百口同日埋沙塲有司優卹臣心傷柳州分據
賊勢猖退保中山攻左江桂林稍定籌軍糧湖南會合士馬疆
綠旗百戰鋒莫當

天威計日收櫓槍尚家之信飲日狂求馬求礮心徬徨厚集兵
力東西防密疏入告周且詳惜哉誤收承蔭降馬雄子大功未就
身先戍是維康熙十九載其時九月天雨霜孟冬穆占復貴陽
得公骸骨歸南昌

賜葬入祠謚忠毅嗚呼傅公真不媿才能濟變死從容碧血淋
漓手書字六世有孫官縣丞徽
丹墀頓首涕濕膺奏呈

御覽寵益增還以世守俾雲祲公氣河岳忠青史豈重區區書

一紙敬承先澤酬 國恩勉立功名自今始

周定王蘭雪硯翁覃溪師屬賦

銘云割紫雲之片石分漾璧水之元光欵署蘭雪肯

曰東書堂寶

周藩宮裏端溪石留與蘇齋試烟墨四百年來璧水香鐫題古
篆看猶識騶虞獻後歸大梁不願移封就洛陽師儒曾聘劉長
史詞賦雅重東書堂鎮平博平皆好士南陵西亭亦相繼本草
圖成爲救荒幽芳千種誰重繪沐河橫決浪如山迎取金容沒
水還一片僊雲依舊紫却隨玉椀出人間元朝宮樹傷心碧樂
府當初歌不得斜陽秋草十三陵今日蟾蜍淚重滴未央殘瓦
永平磚都與人家作硯田尋常故物知何限名字關心特可憐

九日同法時帆學士謝香泉禮部楊蓉裳員外李墨莊主
事蔡澆霞儀部劉芴初許青士兩孝廉陳石士庶常集

陶然亭分韻得霞字

長安亦有感秋地幽尋不許塵隨車野亭三面俯雲壑荒田一
白皆蘆花哀蛩沿徑語相答閒鷗得水浮爲家石邊寒瀨響激
激林際密雨來沙沙老紅半樹葉爭墮濕翠數峯雲互遮聽鐘
更覓煙外寺汲井欲試春前茶可憐古佛我同瘦向來廢殿今
增華形骸自笑亦土木供養何處無煙霞浮生憂患日千種吾
儕聚散天一涯風塵落魄有孤鳳歲月回首如驚蛇奇書海外
客爭購墨莊白疏戰鼓城頭君自過蒼裳前以守伏舊游十載
此蠟屐新詩九日誰籠紗青山荷鍤便沉醉黃菊插帽從欹斜
酒酣落筆氣逾壯不知凍墨塗成鴉

餞秋日再集陶然亭歸飲蓉裳寓齋兼懷船山

去日卽千載何必古與今重陽前度賞秋地紅葉漸少青苔深

香蘇山館古體詩鈔卷四

十

縱使歡悰尙如昨繞亭屐齒誰能尋暫別卽千里何必天一涯
秋光如此不成醉瘦殺枝枝黃菊花縱使夜遊燭堪秉故人明
日風中沙故人難聚秋可惜今日送秋如送客蘆花盡處只斜
陽遙山一帶傷心碧長安車馬塵漲天此地曠觀殊可憐座中
酒客何僊僊前多老蒼今少年少年跌宕百不愛日日題詩徧
寺樓高才自合致身早痛飲肯負今年秋壯遊我亦青春客四
度看花踏陳跡黯黯秋心二十年青山依舊頭初白感君意氣
爲君歌海內知已今無多清狂却憶船山老不共花前金叵羅

時服山分
校鄉間

黃賁生由庶常改官彭水令屬船山書冊贈行

我乞老船畫爲贈賁生行賁生復乞我題句我先讀畫難爲情
怒濤出峽蒼屋裂中有啼鷗古來血君行未抵劍門關已見千

山萬山雪君本謫仙人簪筆白玉堂一官忽墮百蠻裏文采爭
隣孤鳳皇君我同歲生先我已通籍板輿迎養亦風流何事看
花感淪謫縣令况是親民官讀書用世宜心殫能令赤子輸誠
早豈畏青天行路難涪陵風土古稱厚頗習詩書安并曰山城
前歲賊經過戰地重耕田苦瘦君出作吏髮未爛杖藜那得窮
幽攀先除積弊養元氣訟庭兀坐如名山我求進士不得進霜
雪蹉跎生旅髮天寒愁煞倚閭人白雁南來少鄉信暮雲慘慘
風蕭蕭送君更上蘆溝橋交君十年別萬里去住蒼涼乃如此
君行復向故鄉過爲問衰親病若何平生空負凌雲氣今日相
看淚最多

題襟館草木雜詠

老梧一千尺特立異羣樹孤根天所培年深飽霜露人間自春

香蘇山館古體詩鈔卷四

十一

秋榮悴守其素

青蘭抱素心寄生蕭艾間叢深時一花香遠如空山臭味平生
同對之終日閒

亭亭丹桂枝初花已含陳月中田地寬倦人不爾種零落小山

秋飄香入殘夢

黃菊有正色離披終可哀心知肯時花獨爲秋士開病蝶亦無
依避人常一來

海棠花不多枝枝濺紅淚弱質難自持情深天亦忌可憐絕代
人金屋轉憔悴

葵花大於盤高幹擎風霜感此負米客孤露同所傷但餘一寸
心宛轉依秋陽

木蓮能拒霜自許乃標格不幸以艷名東風苦未識嫁晚豈傾

城秋江照顏色

楊柳未搖落，綠先自憐。跪地千萬絲，盡此銷魂天。斜陽已不堪，况復飄殘蟬。

種竹望成林，碧陰浸庭院。吾愛秋筍枝，粉落節逾見。捎雲氣千尋，根乃蒼龍變。

短籬蔓牽牛，花葉同一綠。故園秋雨多，時時上鄰屋。再誦采藍詩，離憂頗堪觸。

蓼花亦能紅，其枝難強扶。移栽壞墻陰，潦倒思江湖。扁舟我未歸，夢與沙鷗俱。

江雁才一聲，秋色已如此。枝葉爛成花，苔陰照紅紫。老景能自妍，早衰殊愧汝。

孤芳秉佛性，嘉名優鉢羅。託根豈無地，奈此秋風何。持此一現花，住世終蹉跎。

香蘇山館詩餘卷四

十一

述懷呈鐵冶亭先生

長白秀特鍾，公秉青雲姿。其才可經國，餘緒傳歌詩。我生孤蔭中，少亦遊京師。題襟徧羣公，識公真恨遲。

去年來廣陵，載載艤淮陰。權一刺龍門，投未見心孔。悼公時在病中，強起著紗帽，覲面領神解，拈花但微笑。

我初未見公，私淑由門墻。索題官硯詩，感激歌南唐。此詩今寫獻，賀硯先自傷。片石豈足矜，所幸歸歐陽。

貽公詩一冊，報我以千首。攜壓運租船，龍光射牛斗。公詩海與江，百變無不有。相契在苔岑，託公名不朽。

期我共千載，憫我才一科。淵源出大賢，差足償蹉跎。公早樹桃李，孫枝如筍多。微名乃深注，感愧當如何。

庚申公門生與鄉試者七八嵩梁兩座師

馬與
別公入京師再下春官第公卿本愛才命窮才亦悴射虎石誤
穿軍中惜猿臂擊楫渡黃河依然負奇氣

國士感知我一第安足酬致身貴年少祿養况所求衰親望成
名霜雪今滿頭無官亦早歸歲歎難爲秋

公官雖督漕晨餐但秋菊貽我薦士書代謀將母粟吳越多舊
游硯田望先熟瓣香誦公詩蘇山閉門綠

題蒲髯出塞圖

廣文四十鬚如戟一第蹉跎老纔得報罷依然作冷官壯遊苦
憶灤陽客灤陽秋色似黃河萬騎塵沙擁駱駝名王厖

蹕軍容壯蕃將吹笳朔氣多君騎瘦馬衝寒出行帳從容看理
筆想見詩成笑仰天青海風高皂雕急兒意氣勒燕然書劍

依人亦可憐酒酣一拓黃金弩我憶將軍射虎年

竹柏樓詩爲袁節母作兼示又凱秀才

樓上星與月樓下水與雪母居樓中央竹柏矢高節柏堅竹苦
寒樓居十五年母足不履地母心惟籲天母身未死心先死願

天佑我少孤子母身雖死心猶生願兒讀書成令名節母之子
多儒林上天下地鑒此心君不見陽湖洪太史

書圖裏袁家孤兒亦如此

康山草堂歌爲江頡雲作

康山一卷石寄託城市間得姓乃以狀元誤盛名遂歷揚州山
當年流竄猶英氣傳粉簪花恣遊戲若果尋秋到草堂名山便

是埋憂地山上危樓倚夕陽風帆葉葉度雲檣隔江遙見萬峯
揖白鷗影盡連空蒼山下不知何代墓王侯草木今同腐夜半

衣冠尚出遊神燈吹入青楓樹吳生年少來揚州第一華筵開
此樓燭花萬朶照狂醉天河倒入銀槎流琵琶仙語復鬼語一
曲聽殘淚如雨人海飄零又十年素心賴有山靈許昨夜秋風
隨雁來主人招我傾新醅桂花三日落成雪飲酒不痛徒心哀
君不見康對山歌且舞救友汚名心獨苦烏紗一擲能千古英
雄才子亦黃土碌碌狀元何足數

書陳耳庵

馮縉

解元疊韻詩後

手種桃李花不如松與柏耳厭箏琶聲不如金與石書生長揖
氣吐雲豈少堦前地盈尺鐵公愛才天下知能得真才意尤惜
陳生倜儻真解元詞場年少推眉白十年書劍西復東傾蓋我
記吳王宮有才如此士不進可憐硬句猶盤空酒酣縱讀氣爲
壯淮海泱泱吹大風險韻十處力千倍誓與韓孟爭奇功大材

香蘇山館古體詩鈔卷四

十四

槃槃待梁棟讀書豈以科名重歸舟我望馬當山一櫂正須風
力送秋霄何地縱神鷹老竹無花待飢鳳願君寶此璧連城他
日當爲廟堂用

韓王鈞臺再用杜韻

漂母祠前森古柏韓王臺下留荒石漢家陵寢已成灰哭兀此
臺更千尺英雄絕代位置難布衣王侯俱可惜淮陰年少不登
壇秋水一竿髮應白八千子弟來江東楚人一炬無秦宮鴻門
宴罷玉斗碎雲夢游成飛鳥空巖陵後來豈鑿此山水高被先
生風文叔推心勝推食諸將幸保雲臺功感時寂寞思梁棟一
臺獨以韓王重失路王孫我再來荒江一飯嗟誰送人間遭遇
殊可哀野雞得意成威鳳生死功名兩婦人真王如此真何用

黃心庵

承增

招飲同裘翁軍話舊

扁舟暫繫淮陰樹，明日北風迴櫂去。踏歌岸上來，汪倫挽斷青衫留。客住黃山詩老尤難得，半面未謀心早識。弔古來經漂母祠，江山萬古同蕭瑟。吳娃十五嬌可憐，畫橈迎取來樽前。新花一朶照江水，疑是江南三月天。吳生小別江南秋，二十四花生暮愁。曲中舊有此名，今惟唐芍藥。今年病起髮先白，此身雖在如浮漚。夜闌重聽湘絃語，宛轉新聲換宮羽。黯黯江雲凍不飛，歌珠百串拋成雨。痛飲爲君倒玉杯，美人名將易成灰。韓侯釣石今千尺，誰肯衝寒更一來。



香蘇山館古體詩鈔卷五

東鄉 吳嵩梁 蘭雪

秋懷二十首

此生幸爲人此日殊可惜僊佛與蟲沙前身杳難識失脚塵海中自援苦無力惘惘三十年勞勞半行役

少乘猿鶴性邈然慕山林一墮文字障俗累從此深讀書能等身其氣頗駸駸所志乃曰卑不過纓與簪文體摹東京賦才誇上林哀哉失衣珠敝帚成千金

匹馬踏槐花七戰皆不利名慚公府徵賦

召行殿試一科如登天既得亦憔悴頗聞主司賢遺珠發深喟岸幘公卿間窮途負奇氣遠海秋風高蒼茫萬行淚

骨相太寒瘦富貴非所期縱燒塲屋文獨力昌吾詩哀吟屏人

香蘇山館古體詩鈔卷五

事一字千鎗搜奇天亦驚鑿險山爲移夢中得僊筆古來傳者誰心花連夜開不借東風吹

仙詩吟未成百鬼怨交集憂端從天來破巢風雨急身名苟白全寒餓計焉及一區供祀田租亦縣倉入

故鄉已無家襪被江淮遊持節有故人高義傾諸侯念我父未葬窀穸爲代謀知我母須養饋遺無不周庭闈願粗給身外吾何求平生感激多此德逾山邱

江南冶游天花月美無價玉人吹洞簫行雲駐歌榭誰知感秋客歡場轉悲咤酒半權船迴獨哭平山下

同心不數人各在天一方別久斷消息傳語多不祥遺書求茂陵殘笛哀山陽我死詎足悲餘生厭風霜所媿負知我百歲皆

尋常

勞人故倦游雲壑懷清虛南豐有廢宅借讀名山書門集郡諸
生俸分鄉大夫傳經媿都講迎養宜板輿一亭圍古松一園種
新蔬團圍奉菽水此味殊有餘

舊歲留公車羈懷苦抑塞四月斷家信中夜擾魂魄孟秋書始
到慈體果不憚吾母嗟早衰憂勞有由積侍疾茲不遑浮遊本
非策積雨連關河百計歸未得典衣購紫葳臨寄淚先滴

我生惟一兄不幸已暴夭膝前四孤雛慘若墜巢鳥依我今十
年飢寒幸相保學行憂未成婚嫁畢須早我年將四十一兒髮
未燥種松望參雲樹成人亦老槭書慰寒閨頭白孫可抱且借
姪若婦殷勤事孀嫂

畿輔壯遊地連歲多偏灾蛟鰐狎巨浪所至山爲摧百家無一
椽沃壤淪蒿萊水退差可耕飛蝗亂成堆民窮不爲盜橫死良

會蘇山館二體詩鈔卷五

二

可哀吾鄉更苦旱地瘠天不培貧家三十口請粟誰通財我爲
求養出聞此心驟灰決計掃蓬戶扁舟歸去來

治裝七月杪才下通州船船行復滯滯望眼渴欲穿九月抵揚
州十月當言旋一病三十日性命如浮烟埋頭藥裏中身世殊
了然夢蟲苦未足書蟬安得僊且復忍須臾勞生真可憐

昨夜秋雨來先集梧桐樹病中聞此聲悲深轉成悟天地本寄
處萬劫一朝暮此身但微塵浮沉沉况多故自立苟不堅達觀亦
爲誤請看歌舞臺下有英雄墓

丈夫樹奇節殺賊當提戈機槍淨一掃民氣歸天和對策空萬
言不登李邵科故山可歸矣經世將如何

年少矜才華跌宕日千紙偶效六朝人佳句遂成綺意外流傳
多閨閣效吳體詩成人繡線其新亦可喜老筆今無花名心冷

於水一榻茶烟青但求新睡美

閉門卧兼旬醯雞甘處蠹讀史忽長嗟古賢入新夢觸邪忌神
羊忍飢悼孤鳳屠火人不知履霜天已凍大廷正需才迂儒本
無用蛾眉畫未成謠詠女先衆埋照託疎狂酒悲時一縱知己
九原多仰天心骨痛

二豎夜相語此客狂且愚窮愁死不悔苦吟方自娛不如縱使
脫罰令追詩逋昏眸試一揩庭菊如麗姝秋陽暖病骨計日當
潛蘇白鷗心已飛浩蕩歸南湖

皇天憫奇窮官逋荷寬貸石田雖就荒草堂賀猶在老桂枝出
樓蒼雲偃成盖墻外香蘇山依舊掃寒黛人海閱已多村居終
可愛溪梅吾故人花開堂下拜

讀書二十年所見無一斑學道悔不早憂患高於山人持定
力出處殊安閒如何背康莊自行荆棘間治疾窮本源百念秋
草芟人天聞慧香豈在扁禪關扁舟持釣歸柘溪多白鷗悠悠
溪上雲未曛先知還

題詞附錄

王芑孫 鐵夫

昌黎古之狂累作秋懷詩老鶴中夜警疲馬長塗嘶吾儕本
秋士屬詠固其宜君顏若春花詩又奪其姿當時青鏤管艷
發桃李枝心花所怒生不遣春風知年來久憔悴把鏡瘦通
眉可憐標梅嫁窈窕難自持却歌壯士行決去幼婦辭幽響
激哀玉孤致鳴寡絲么絃急無緒變徵聲匪怡鮮新出古澹
抑塞成離奇五降不容彈悅魄恒於斯我聞春絢爛凍閉以
爲基秋爲歸根始刊落亦所司領將霜前意渺我物外思誰
能落其實索饗就晚期中聲要有止清廟登臆噓

次韻答吳暉字煇卽送歸南城

江雲久隔廬山面舊歲公車才一見邗上題襟墨未銷萍蓬明日風吹散故園可耕山可樵京塵不到龍門橋扁舟歸去夢先美菽蒲兩岸秋蕭蕭讀君新句真傾倒意氣縱橫風格老筆采猶開夢裏花名心未翦霜前草酒狂一吸三千卮熱血平生澆向誰籠中病鶴仰天泣爭及閒鷗自在飛床頭鐵笛新求得贈汝摩挲銷永夕莫遣龍公倚擢吹離人一聽頭俱白

次韻樂元淑寄白菴大庾

風塵漸老人間鳳鄉信經年隔章貢斜陽衰柳畫傷心去歲與君曾入夢百花洲水秋屏陰畫蘭畫竹詩同吟興狂潑墨曰千紙當時意氣殊駸駸榜下秋風吹馬首前年同醉離筵酒一第蹉跎老未成經世才高復何有今年匹馬辭燕郊幽棲誓結蘇

香蘇山館詩鈔卷五

四

山茅相如爲郎本非願賁賦聊解臨卽嘲淮海歸來舟一葉壯心誰擊中流楫聞君痛飲日無聊卧對滄江更愁絕病眼看花得暫新百年須愛苦吟身白頭能踐匡山約俱是儒林傳裏人

去年七月十三日夢白旛示一畫卷屬題絕句云繫馬斜陽何處村亂蟬鳴咽又黃昏垂楊誰畫當年樹葉葉秋烟是淚痕

題梓州惠義寺塔中唐人書藏經墨跡

二百十六字一字一牟尼雷電掣不去風火窮所施歷百千萬劫佛力陰護持塔圯寺亦廢完好如新時徐公遊梓州購此心力疲珍弄三十年考證疏羣疑鯁生陋見聞來問元亭奇以何翰墨緣而乃獲觀茲竊聞曩哲言書家不難爲名跡得數行便足終身師况此十四頁翠墨猶淋漓薰浣朝夕玩神理若可追如何一捉筆十指同懸槌願借梵王法心手爲我移一笑拈妙

花慧業生臨池

書曾寬谷都轉賞雨茅屋詩後

使君論詩妙入神千變萬化同一真使君作詩勇無匹天馬行
空怒雕出我與使君交十年文字骨肉心纏綿隔春風笛怨楊
柳及此五泊邗江船使君別後詩逾富大筆堂堂逼韓杜千言
立就氣爲潮百鍊功成字如鑄我才讓君十倍多讀書用世俱
蹉跎散木自知成臃腫寒谿焉得稱江河畫船紅燭徵歌舞意
氣當年狎龍虎此心病後入枯禪一任天花散成雨人間日日
憂患纏若使長生更可憐江山過眼亦陳跡佳句尙可支千年
君言絕業貴早成我聞此語心骨驚行年四十尙如此名山何
忍孤平生古人樹立先功德但以詩傳原下策憑將忠孝發深
情要使乾坤留正色千首光芒燭絳霄願君及早付開雕精神
獨造無今古此集騷壇定不祧

香林山館古詩抄卷五

五

南昌使院呈座師李小松先生

讀書慕科第此意殊芟芟遭逢竊自慶瓣香歸大賢吾師秉文
衡心如月印川所拔多俊英桃李何翩翩我媿嚮道晚刻楮工
徒然獎場乃逾分引陟蓬山巔語我放榜夕紅燭高於椽書名
至十四萬口同一傳京華使節歸望我眼欲穿往往誦佳句擊
賞公卿前愛我才不羈翱翔挾飛仙神駿踏空行鹽車苦連遭
憂我名早知吳絲繡新篇百花爛春晴一雨難爲鮮講學務深
厚習靜求幽偏閉門觀九州絕業當千年

京塵浩如海雷聲轉華轂名位豈不崇所志或榮祿公抱經國
才金甌待枚卜著書方滿家說士甘於肉積雨庭樹陰簷聲瀉
飛瀑下直但焚香西山捲簾綠我寓雙樹軒載酒及休沐公卧
刺亦投愛才到僮僕高秋詠皇華星軺踵前躅當年秋笋枝已

作梢雲竹山川生異才禮樂待陶淑行看教養成高文化淳俗
公車嗟久淹誰請西華粟執經願相從歸心繞林麓

去年七月杪買船下通州轉粟集萬檣客行多滯留九月抵卬
江一病叢百憂寄生藥裹中身世如浮漚自念當永訣夢亦蘇
門游恩知負平生地下安能酬冬晴氣稍蘇白髮新上頭典衣
賃歸權浩蕩隨江鷗還家歲已除雪夜開層樓衰親抱孫出一
笑涕始收積勞求暫息再生非所謀團圍酒一杯此樂輕公侯
我生嗟少孤兩母幸無恙疾並憂虞百懷無一暢近邀章服
榮苦乏升斗養令名貽未能承歡職多曠吾父在殯宮霜露益
哀愴買山近香蘇一棺始深葬羣公贈麥舟高義古不讓表章
賴椽筆萬古照幽壙翁覃谿先生有兄復早歿撫孤愧無狀何幸桐
孫枝栽培出宗匠憂患二十年身家託鯨浪以茲文翰緣陰荷

香蘇山館古詩鈔卷五

六

神力貺兩世從公游恩深逾初望單門振自今立雪氣先壯
孤篷載秋雨負笈來南昌公方扃使院校士周且詳自序試牘
文立言貴有常五倫與六經根柢爲詞章榜出土林賀羣英萃
膠庠我隨玉笋班再拜升公堂公念久不見握手喜欲狂存問
先老母感涕惟沾裳出示哲嗣文有作皆擅場年少心怒花搖
筆星吐芒奇才應運出生此孤鳳凰養成五色羽雲霄竚高翔
階前有病鶴垂翅心自傷聞此亦感奮高唳天爲霜經世與名
山所願何日償努力在青史附傳韓歐陽

次韻答張愛濤

聰賢

進士兼示甘三海樵

之俊

蘭芷生沅湘臭味無差池鸞鶴慕儔侶高唳有餘悲我卧石溪
館養疴下空帷孤懷寫幽韻不願時賢知故人有吟癖愛我平
生詩三載廢酬唱苦爲風塵羈藏園昨造飲百醉酒不辭告我

從君游堂奧無弗窺彈琴山水間賞音觀牙期箏琶衆耳諧乃
或譏狂癡神契有仙才推我獨冠時凌雲每高唱聽雨先沉思
心知面未覲病若渴與飢詰朝脫相見請以新篇貽文章交有
神古義今見之投以感秋句酸入肝與脾君家本華胄綵筆先
春摘褪躬先孝友講學懲澆漓經術本根厚綺麗餘波爲技也
進乎道曾不須臾離贈我三百字字字經鑪錘幽花出晚秀喬
松偃橫枝遐哉玉笛音妙得仙人吹世間病俗多聞此真名醫
擊磬能雅歌風義况可師學步吾何堪鴛鴦追黃驪夙懷今盡
傾就君質然疑奇才戒縱橫大道歸平夷讀書爲經世愧勵方
從斯同君慎出處寶此無瑕姿

周素夫 世錦 蘇樓聽雨圖

君家蘇山在桂陽山下開屏嵐翠入夜涼微雨過山樓千朶芙蓉

香蘇山館白隱詩鈔卷五

七

蓉曉猶濕我寓蘇潭依灌城銅鼓亭空貯煙水竹枝出檐桐葉
疎日曰秋聲詩夢裏君來論詩喜欲顛自詫神交今十年瘦島
何人肯金鑄癖嗜乃結前生緣金粟花前一杯酒意氣相傾感
君厚塵海浮沉已半生俊骨仙心復何有亭中雙鶴歸杳冥病
侶重來梳翅翎蓬山萬里孤月白縱能高唳難爲聽西風連日
吹單權歸及故園秋未老香蘇山亦對門青雲樹蕭森如畫藁
山館思君翦夜檠疎疎涼雨又三更對床忽憶蘇公語今古銷
魂是此聲

游積烟山求宋安撫使陳公偉節墓不得遂觀龍潭而歸

積烟爲吾縣名山第一宋史載安撫使陳公偉節與元
兵戰敗自刎於此山舊有寺疑卽公祠今爲庵祀佛像
一碧可鑑破竹之半附爲橋仰承其流樹根有泉湛然
方池雖苦旱不涸山之東麓有石龕俯臨絕壑相傳爲
某禪師坐化處西麓有龍潭云持禪師遺鉢禱雨於此

者多驗諸泉合爲瀑作或飛爲雪激爲電觸石而怒轉
爲雷霆甲注於潭其深無底是曰北風甚寒潭水欲冰
淵聲冷泠然猶與松濤相逐立坳多廢然所題名字及
孫在瑄溪者求其墓不得遂立主於庵然亦不泯爲佛
官秩與正史未符嗚呼以公忠烈之氣死而不泯爲佛
爲龍無所不可繼黃者流乃妄附託以自神而後人亦
沿譜牒之陋而未考其詳當謀於瑄溪欲卽山巖立專
祠會以入都未果他日歸當謀於瑄溪欲卽山巖立專
且樹碑潭上鐫木傳於陰而榜其門曰鶴心寺鶴心者
公所撰詩集而陳氏譜以爲別字者也祠宋成輒先爲
此記以自堅其志而附以詩

南宋陳公死節處積烟萬劫爲名山寶陀庵在祠廟廢方池老
屋殊荒閒有佛所坐今爲龜有龍所卧今爲潭孤忠埋沒詫靈
蹟祇與樵牧資游談咸淳進士名父子一辟幕官終不起趙家
塊肉填崖山來作斷頭安撫使江東所部兵餘千屯火燒山事
可憐李景何人乃偷活贖罪敢用朝廷錢文謝當時死相繼海
枯石爛猶英氣陳家兄弟同捐軀一劍青霜照天地吾祖亦叅

香蘇山館古體詩鈔卷五

八

丞相軍空坑戰敗甘沉淪香蘇山下抱書死野史亭空惟斷雲
忠魂俱作名山主天上論交定心許六陵無地種冬青何況孤
臣一抔土公生無負死有歸爲龍爲佛皆所宜廟門應榜鶴心
寺潭神附薦龍公祠此來攬勝攜山僧瀑布未斷溪先冰寒碧
一奩不敢唾神物恐隨雷雨升山風日暮吹松柏廢冢如碁尋
未得臨水招魂誦楚詞蒼茫此意無人識雲祇近在瑄溪村祀
典名山合並尊大書宋史刊元石我亦江西制幹孫

過蘇州上汪稼門中丞

平生不識汪中丞治行千載當服膺韋丹惠政楊震節澤如春
兩心寒冰往年一秉吳西臬七十州縣官方澄安民第一在除
暴搏擊鸞若霜天鷹通衢大榜列名姓示以積惡宜嚴懲聞風
胆落竄山谷村犬不吠魚自醫剪除巨蠹養元氣刀圭應手蘇

積癥江鄉萬戶卧高枕百年盛事覩未曾吾鄉地界閩粵交盜
賊往往多侵凌販鹽造紙聚亡命奸胥大猾相依憑公來歛迹
去復恣思公淚下如連繩三吳去年苦飢饉哀鴻中澤殊可矜
似聞海賊購民米其害更甚蝗與滕救時妙用公自有監河粟
到炊烟騰今年雪霽風日暖麥綠已遍東西滕火龍照江馬行
市傳柑節過猶張燈轅門鼓角春晝靜宰官入定爲枯僧元墓
梅花九千樹清游肯費酒數升東岳西湖有奇句乞公石墨貽
行滕下士經世愧無術幽風詩獻吾差能

後康山草堂歌贈別江韻雲

草堂我舊游一過一沈醉樓以對山名萬古有秋氣主人家世
稱豪賢黃金散盡客不前平泉草木無人問孤露傷心三十年
梅花一樹香逾烈老樹新枝艷冰雪翟門冠蓋更如雲肝膽向

香林山館詩鈔卷五

九

誰傾熱血我與梅花多夙緣賞花獨在花未妍孤根偃蹇同松
樹不卧寒溪定插天平生意氣千秋託車笠前盟愴猶昨此心
萬里月一輪豈與浮雲共飄泊東風連日吹怒濤驚背笑兀三
山高青天碧海瀉胸次此中芥蒂無秋毫迎門一笑倒雙屣執
手相看吾老矣別來人事百未詳但讀新詩雜悲喜男兒樹立
要不磨一身砥柱當江河摩天自許韓杜手蒼生凍餒將如何
廿年辛苦才一科所得牛毛失已多不能殺賊提金戈徑台歸
卧南山阿行年四十頭已白出世入世俱蹉跎湖山賴有故人
在感激猶爲勞者歌歌聲夜半風雨急林葉蕭蕭山鬼泣乳鶯
未轉新柳梢何處秋聲忽吹入江郎江郎真異才風塵混跡殊
可哀救時但有尺寸補何論公卿與商賈君不見江南江北多
烟鬢此山兀傲如平山山下英雄六朝墓却讓茲樓倚江樹吳

姬十五初破瓜夜闌勸客彈琵琶長安卿相工畫諾痛飲且看揚州花

京口舟中寄賓谷運使

別君題襟館三換霜與星思君豈不勞對酒雲爲停江湖二十年飄若風中萍勞人故多病安神求茯苓衰親況寡歡念別先涕零膝前一杯水膳抵蘭陔馨吾髮亦漸白名山誰乞靈才華悔虛擲稍稍溫舊經以此百念灰終歲柴門扃卧看香蘇山江南無此青

前歲買青山改卜先塋兆譜牒繼以修焚香拜家廟書成治行裝已賃吳越權縣令纂圖志執祛苦相勞掌故三百年得失待讐校東鄉建雖晚前芬炳忠孝寒閩苦節多貞石懼弗耀興利宜通河除害先折漕藝文刪其繁風土紀厥要吾非著述才但

香蘇山館日體詩鈔卷五

十

以民隱告

扁舟溯潮來餘杭及姑蘇看山句或佳日就篷窗書昨夜京口泊妙高倚浮屠海雪花春潮山影涵清虛焦仙吾故人艤棹齋鐘餘循廊詩在碑未讀先歛獻館中手栽花計日皆芳敷相望已如此相見當何如

別題襟館

園花一千樹同植而殊科灼灼桃李英裊裊寄生蘿蕙蘭有本性松桂無改柯地氣詎或偏榮悴如君何我如瘦梅樹生意苦不多移根白幽澗冰雪方峩峩苦寒守孤芳南枝笑蹉跎病蕊儻一花亦感春風和

君有著書手復抱經世才處脂故不潤清風被江淮况得賢太守謂張民氣日以培餘事領騷雅江山媚啣杯我行入長安躑

躅良可哀一蹴萬里雲舊侶多龍媒聞道惜已晚出處百願乖
卽令取卿相自立安在哉西溪秋雨深漁莊臨水開幽期儻不
負持竿當早來

寄張古餘太守江寧

吳生入都復出都與公相見皆姑蘇司馬官閒攝郡事惠澤亦
如春雨敷去年真作揚州守五馬未至民權呼蒼生所在皆赤
子痾瘵豈以時地殊揚州財賦甲天下鹽田百倍民田租六朝
花月廿四橋樓臺簫管無日無歌聲遏雲艷奪月利市一擲千
明珠寒閨有女終夜織嚴霜九月無完襦閭井少年好身手飽
食甘作商家奴柴門有客掩關卧方朔飢死慙侏儒公以名士
作循吏政貴有體謀非迂要培土氣厚風俗先救民病除奸胥
政成治洽歲大有詩酒乃得爲清娛不然平山盛文讌獨以永

香蘇山館古體詩鈔卷五

七

叔增歛歔吳生別公已三載閒居頗讀種樹書淨滌蠹蟻剪荆
棘萬花千葉爭扶疎以此觀物悟化理願公百弊勤爬梳清風
亮節公有餘贈言聊復明區區暮寒一櫂翦江去思公不見心
鬱紆廻看紅燭照烟水峩峩畫舫來游湖

玉磬山房同劉松嵐觀察話舊

論交二十年一別一萬里海東迢遞隔江南今日相逢復於此
世間萬事如牛毛我死已經三度矣一死於金陵再死於揚州
三死乃得狐首邱以訛而傳訛其說頗不侔杜牧之狂東野囚
大抵落魄兼窮愁故人聞之雙涕流遺文零落頗相求茂陵果
得消渴死亦樂豈有封禪之藁文君收瀋陽雪花大於席君與
湘花坐太息長安卿相無尺書海上蛾眉感飄泊此詩寫寄來
桂林韋廬書達蘇山陰百年萍梗多浮沉與君萬里同一心虎

邱玉蘭宋朝樹花人白雲無覓處紅袖攜從天上來玉簫聲斷

尋春路別君五泊吳門船俯仰前塵今十年隨園袁竹汀錄已

黃土潘格立蔣用雖在皆華顛吳生不生亦不死人天飄泊常如

此飢來乞食飽種花不願傷心讀青史長安西笑殊無聊布帆

再湖錢塘潮江流赴海去何急眼中笑兀金與焦君昨訪詩碑

直到焦山頂寫碑人葬空青山病鶴江天判雙影山中有余與

詩則夢樓書也我自陽湖來雜存杭州去兩舟相遇兩不知與君康山

作良晤山中主人能愛客移船約近康山宅梅花落盡對山樓

一潭雲水同蕭瑟痛飲且覆花前杯腰鼓琵琶往事哀達觀肯

作千秋計天以名山養逸才

丹徒贈萬廉山明府

君父我父執金蔡海任葛山兩先生同門璫君我同歲生論交如雁行

君才無不能書畫兼文章同時二三子文采傾南昌君歸自江

南意氣殊激昂單騎踏陣出壯遊紀湖湘盾墨磨未乾巨筆摩

天揚我題請纓圖勉君漢循良兵農政相通未雨謀宜臧三吳

昨苦飢舊業多流亡知君能拊循且視民如傷爲誦春陵行淚

下霑衣裳

丹徒與丹陽相距不百里其地當海門夏秋多暴水怒潮從天

來勢若萬馬駛可憐膏腴田盡汨泥沙底屢歉儻一豐收穫已
無幾官方報有秋民半溝壑矣建閘扼其衝議自前歲始君實
董厥成鉅細有條理蓄洩旣以時官民病良已田禾俱懷新糧
艘去啣尾寢寢遺愛祠歲時奉牲醴謳思及生前其榮媿青史
縣令官豈崇貴行其志耳實惠及斯民權乃卿相比郡守與縣
尉並祀亦可喜飢渴易爲恩速效乃如此寄語親民官素心當

香蘇山館古體詩鈔卷五

七

白矢廉吏不可爲君亦廉吏子

述懷再寄廡山

進取非一途所貴因其材樹立苟不偉科第亦自媒時賢自許
高韓范而鄒枚下聽寒士語秋草蛩吟哀我無箇雲姿伏樞甘
驚駘冷官守四門需次仍遲迴鬻文而入貲家乃無立錫仕苟
非爲貧躁進胡爲哉吾父歿已早孤露餘霜莖吾母名家女甘
與絡秀儕慈烏終夜啼邀榮苦無階九鼎逮養難不如水一杯
以此博一笑衰顏求暫開斑斑五色衣暗淚不可揩依人況已
久顏色如死灰微官儻自給何至同與僂嗚呼茂陵子賦手稱
仙才當日作貲郎凌雲氣亦摧名士恥助邊却拜黃金臺金臺
不可恃飄若風中埃賢者爲親屈古義今所哈感君有同病誦
此腸九回終當棄雞肋蓬門閉蒼苔

河北杏花

香蘇山館古體詩鈔卷五

七

河北連日多風沙斷腸頗憶江南花小樓聽雨在何處夢中春
色移天涯小園紅杏兩三樹籬陰漠漠輕烟遮其南一樹開獨
早繁英照眼枝橫斜牆西兩樹特嬌小嫩寒浥雨初含葩嫣然
一笑隔溪水玉容得酒紅生霞主人挑菜出門去蝴蝶成團蜂
鬧衙尋常簪髻有村女寂寞尋春無鈿車浮生榮悴亦如此國
艷往往生貧家夷光不解吳宮舞辛苦溪頭惟浣紗上林有地
不汝種託根未免傷幽遐天生麗質不終棄桃李未許相凌誇
唐六如斷簫餘韻圖爲王香南別駕作

美人生小住姑蘇蘭蕙爲心水雪膚雙鬢價抵千金璧百轉歌
成一串珠鬢影歌聲爭媚嫵香車細馬看迎取翡翠簾垂玳瑁
床可憐明月當三五三五韶華彈指空離鸞窠鴟恨匆匆九華

箏柱塵絲絲八寶粧臺淚粉紅芳草有情纔着雨落花無主又
隨風誰知雁足傳書杳翻使蛾眉泣路窮路旁憔悴無人惜愁
絕瓊枝傍荆棘石竹衣銷隔歲香芙蓉鏡改當時色從此芳心
寸寸灰羞他文鳥雙雙翼斯養由來痛失身名姝何取誇傾國
傾國傾城願總違瑤臺金屋事依稀舞殘玉笛驚鴻逝吹竊湘
裙化蝶飛香魂在再憐猶在瘦影娉婷訝轉非雲雨至今疑宋
玉琵琶終古怨明知畫中風景愴猶昨只少江南好樓閣絲絲
搖月柳聲疎葉葉垂烟梧影薄烟月蒼茫換六朝年年幽怨咽
清簫一枝紫玉腸同斷兩袖黃金淚未銷六如本是傷心者剩
粉零脂借揮灑平生乞食徧歌姬死當埋骨桃花下釣月亭空
二百年雲英掌上見嬋娟詩成爲汝青衫濕夢繞潯陽送客船

香蘇山館古體詩鈔卷六

東鄉 吳嵩梁 蘭雪

三月十八日陶然亭雨集

自法學士式善以下客凡四十人主人則謝禮部振定楊戶部

芳燦李兵部鼎元程兵部同文蔡禮部鑾揚張檢討問陶伊知府秉綬陳編修用光陳刑部希祖謝吉士學崇也

騎驢千里入盧溝風檐橐筆苦未休故人招我城南遊窮魚縱
壑鷹脫鞞江亭一雨成深秋雲水曠然銷百憂亭前新柳嫩黃
色亭外西山青欲滴烟雨濛濛畫不得車聲如雷喧九陌衝泥
肯踏看山屐我是當年餞秋客一竿歸釣南湖烟白鷗夢亦隨
秋船谿山俯仰三十年聚散如此殊可憐痛飲且為春風顛明
日落花吹作田

蘇齋石硯屏詩為翁覃溪師作

齋藏蘇書天際鳥雲含雨重樓前紅日照山明特真

蹟今得硯屏圖書天然
與詩境通肖屬為賦詩

香蘇山館古體詩鈔卷六

山中雲落處結石有畫理其妙不可測世間安得此此石徑尺
剖作屏硯雲山氣同一青斜日杳杳烟冥冥似將雨意來窻櫺
山南山北陰又晴中有瀑布松濤聲結構至此難為名筆所未
到皆天成蘇齋有癖似類來得之蘭峪乃狂喜夢中佳句忽飛
來獨以詩禪叅畫旨蔡君謨句策坡畫游戲當時亦偶耳精神
所寄七百年妙蹟乃結山與川化工之理歸自然萬物何必窮
雕鐫君不見天台齊先生召老作卧雲客萬松山下得奇石印
之成文繪為譜歌以長句配石鼓事見我賀此石遭遇同鑑賞
乃得覃谿翁不然棄擲荒山中

明倪文正公小桃源詩真蹟為伊墨卿太守作

詩五首其末章云攜

將琴鶴過夷門比似溫公獨樂園聖世遭逢無避理不應題是小桃源

東林不可廢一疏首伸君子氣南都尙可爲一死下報先皇知
三朝要典爲公燬八策早行公不死科臣四出來催租軍餉不
給民何辜道學封疆皆鎖斧朝廷可惜成孤注當時縱有武陵
源欲櫂漁船向何處歸田奉母出山遲琴鶴夷門送者誰聖世
却言無避理暗淚已灑冬青枝百年龍戰風濤沸春水桃花換
人世冷金紙上有秋霜蠹魚未蝕神仙字首章有神仙自三山
合享三山之句
能享定仙才書院生祠盡劫灰上清註籍多忠孝不用胡麻飯
一杯

思元主人畫竹見貽題曰干青雲而直上甚愧其意賦此

報之

主人畫竹有高雅持贈吳生殊可惜枯毫得酒心槎枒一筆凌
空氣千尺山中昨夜聞春雷怒笋縱橫穿石崖蒼龍獨卧幽磧

香蘇山館白體詩鈔卷六

二

底偃蹇不是干霄才竹性雖同託根異畢竟南枝得春氣林陰
背日放梢遲瘦影蕭蕭散涼翠主人愛竹心獨偏移到華池尙
有烟此君原是瀟湘種一醉先教灌玉泉廟堂峩峩待梁棟笛
材縱佳豈堪用一枝筠粉落秋深願吐青花飼饑鳳吳生與竹
同性情下筆惟聞秋雨聲叅天掃地皆隨分自古人才要養成

用放翁句

鶴聲篇次韻酬覃溪師

鶴聲懷空山藹氣出中林相求在性情澹佇秋堂陰百知無一
酬五字惟哀吟持之久益固養以靜且深日夕香蘇館寸碧生
遙岑一踏長安塵冰雪違素襟得兼曠輿旨飫聆正始音感激
更相和傾寫難爲心同調有樂生睽離方自今孤絃愧未安冷

冷張夜琴

寄洪稚存編修

與君江南別同有看山約一行不能踐塵海愧飄泊黃山與廬山妙處天下無相去不千里皆作神仙都我自江南來君已杭州去聞君不入城徑喚桐江渡桐江春水多一路看山行計日到潯陽五老來相迎老松三萬株飛瀑八千丈青龍氣天矯白龍勢奇宕雲從石罅生須臾遮四山羣龍舞其中以雲為往還雲過松逾青樹梢皆瀑布一石萬松陰是我聽泉處石上有菖蒲松下有茯苓飲以中山泉髮可千年青廬山君已游黃山我未到桃花阻漁舟山靈定相笑百事輸君早名山結願真終期遊五岳揮手謝時人

四月二十日夜書事

萬事非自謀一動乃成妄移足無戒心滅鼻有凶象貌躬況多

香林山僧古體詩鈔卷六

三

艱跬步敢輕宕哀哉昏暮中驟爾精魄喪失身爭毫釐掉頭誤趨向意外析奇骨床下卽幽壙風雨方夜半呼號欲誰傍血注久始冰肉爛險成鬻籠禽羈四隅崖馬蹶一放波濤至旋踵巴蜀不踰丈大地念殊寬沉憂獨吾墓岐路生旣窮觸堦死亦壯忍痛聊須臾衰門賴貧養辱親古所譏垂堂誠寧忘墮行懼冥冥摘埴憂悵悵躁進多危機幸存出奢望願防衾影微恒稟鬼神相心空理自燭身危道可杖同臭不數人揮斤妙無恙作詩求良箴隨事獲深創

題覃溪師所藏東坡書蔡君謨詩及陳太守放營妓詩墨蹟

蹟

學士一生作春夢却寫君謨夢中詩後來更說夢中夢花月湖山皆涕洟西湖日夕公事了想見迴船初霽時斷雲含雨斜照

入樓下湛碧搖風漪陳家老守頗好事不許春恨侵蛾眉雕籠
一放雪鷄鷓羞殺東風桃李姿此詩不入烏臺案諸君且賞黃
絹詞嶺海萬重墮吟魄茶烟一榻生鬢絲熙寧舊事那可說遺
墨幸收柯九思山谷跋失道園在倪墳張雨馬崇董昌共同嗟咨
蘇齋今日續詩夢手蹟百勝摹殘碑偃松贊字獲亦創筆法勁
比寒松枝硯屏昨又蘭峪出天然石畫陰晴移始信神明有真
契更七百年藏者誰前身我豈老居士看人青眼萬里期詩成
押尾附名印嵩陽帖後休傳疑先生向以嵩梁及陳學士嵩慶
名印押於卷尾蓋以原詩中有

嵩陽居士句也

六月十五日夜且園同法梧門學士看月

斜日墮山湖色暝老樹交檐露華冷月明似與幽人期風味况
兼新句永庭前空水澄若潭屋後積烟暗於嶺未看窈窕上林
梢先與玲瓏散踈影濕螢穿葉墜復高栖烏踏枝啼乍警且貪
涼卧青簟移何用夜遊紅燭秉小園花信閱榮枯鄰寺鐘聲入
虛迥一心出世雲自閒萬事中年酒初醒明朝日霽觀曙荷今
夕風懷對佳茗炎天畢竟水鄉宜歸櫂南湖舊漁艇

香蘇山館古體詩鈔卷六

四

是夜雨中月尤佳再爲一詩

一更待月二更吐三更天淨月當午四更林葉忽飄蕭一片涼
雲送疎雨雨聲漸密雲轉稀明月依然在高樹濛濛地濕烟欲
流磊磊天青星可數庭陰積水入空明簾影移花增媚無直疑
聽雨六柱船只欠搖江數聲艫舊遊我憶雲風堂看月東峯最
高處翠微坐久露沾衣山館歸來雷破柱此間氣候豈深山無
限風光收老圃陰晴難得雨不妨團圓况復當三五年常願
似今夕明月宜人雨銷暑

十六日雨霽夜出二轉橋踏月觀荷至十刹海浩歌達曉
而歸

日坐樹根看月出涼陰一榻銷百憂今宵雨霽月可踏汗漫遂
爲終夜遊十刹海邊幾僧寺三轉橋上多酒樓酒人已散寺門
閉湖月漸升昏靄收水天一綠杳無岸荷芰四圍中有舟大葉
翻蓋露頻瀉高花斂房烟更幽悟來忽墮衆香國佳處自畫胸
中秋風蓬不許縱孤權野步直欲窮滄洲北斗動搖樹深處西
山滅沒雲盡頭此時天地極空濶曠觀人海真浮區荷花以外
只明月閒身惟我偕白鷗逝者無窮駛於水達哉所願埋茲邱
行聽街鼓漏將盡歸扣園扉吟未休詩成持寄石谿館此樂長
安非易求

十七日梧門邀同陶季壽歐陽礪東出德勝門觀三汊河

荷花歸飲作歌

香蘇山館古體詩鈔卷六

五

昨夜縱遊十刹海踏月三更歸五更看花更起曉涼去故人入
城同出城沿河楊柳好村舍但見紅雲無水聲高枝出水葉覆
水千花得意嬌新晴始知一雨善膏沐龍女絕代粧初成晨霞
夕月肯相照霧鬢風鬟俱有情花開絕艷待眞賞士抱孤芳遺
世榮健馬高車去何驟葦籬茅屋誰將迎同心妙得蒞蘭氣野
服來尋鷗鷺盟君家衡麓連瀟湘花時多於西洞庭吾鄉種藕
亦常業溪民勤比山農耕歸田無計且飄泊對花未免思柴荆
愛才今有賀四明金龜換酒能共傾迴船萬古謫仙淚不若痛
飲歡平生

雨中獨遊三汊河觀荷歸呈梧門學士

君言看花雨後佳我獨能爲冒雨遊衝泥踏水十餘里有驢可

躡百不愁濛濛衣袂任霑濕酷愛新涼如早秋茅屋無人雨中
坐喚酒頗勝湖上樓一紅千頃碧萬頃葉更參差花更稠美人
粧鏡拭初曉徑來簾下看梳頭温泉一浴艷尤絕風裳水佩俱
修修我爲看花雨不避花因得雨香更幽便思化作雙白鷺花
陰夢亦隨沙洲紆路再尋十刹海老漁拍手笑未休前夜踏月
今冒雨客非狂疾何所求入門飢腸已雷轉但出新句誇朋儔
頑仙無賴天亦赦縱使歸乘太乙舟妙蓮花是前生骨豈願人
間萬戶侯

書錢南園御史遺集後

我生不識錢御史一讀遺詩心骨酸如此人才竟淪喪豈獨吾
道傷摧殘政府當時竊朝柄私門伏謁多顯官哀哉萬蟻腥穢
集矯然一鶚霜天搏小臣何敢效汲魏

香蘇山館古體詩鈔卷六

六

聖人未幾誅共謹先陳讜議識獨早後褒直節

恩殊寬孤忠入地目雙暝萬里經年歸一棺殘編賴有故人輯

作序頗聞中夜歎謂梧門學士兩君風義今少匹作者志行古

所難生逢盛世厠清要恥效小技工雕刊甘填溝壑頂至踵

獨奉朝廷心與肝擠排不死天意厚貪墨先鋤民氣懼憂時

熱血恣霑灑壓紙硬句多鬱蟠河聲秋挾雷雨壯嶽色夜凌星

斗寒吾儕自植在忠孝其筆所縱皆波瀾衣草附木必同腐倚

天拔地終不刊卽如此集卷無幾苟非眞賞誰能看百篇豈借

棗梨重萬劫乃共身名完嗟我憂患飽中歲徒避箏笛求孤彈

學道不能愧何益琢句但知吟未安平生自好山鬼服昨夜夢

君獬豸冠請棄一切鑄道我不願皮毛師杜韓

錢御史畫馬歌爲法梧門學士作

我讀公詩心骨寒我觀公畫毛髮動畫中天馬並殊特昨夜與
公同人夢雙竹批耳風怒生五花滿身雲欲凍人間何處可橫
行天上騎來不施鞵此畫懸處卽公榻往日揮毫試奇縱遺墨
搜求敗壁中知已九原堪一慟我知公畫不求似自寫平生託
吟諷其氣萬里生不羈其骨千金死迥重駑駘愧我方伏櫪神
駿如公信殊衆韓幹畫肉亦皮相伯不賞音足心恫天閑今
日方需材翦拂期爲當世用龍媒有社不易求名畫須充渥注
貢

次韻答梧門

論詩如論人所貴持定力才名畫作餅志士淚霑臆洗馬今達
人御史古遺直綢繆千載交慘澹數三墨谿鶴秋夜聲嶺松歲
寒色我作畫馬詩豈有凌雲筆輪囷斲膽麤芒角枯腸出感遇
無歡棕贈言有深識廬岳高峩峩江上清湜湜特立憂未能踈
狂氣先抑篇多元白酬句險孟韓逼道求真詮斯言敢終食

香蘇山館古體詩鈔卷六

七

和梧門雨中見柬

君詩如靈泉隨地爲屈曲深者澄作澗怒者乃飛瀑我性如閒
雲不可受羈束偶然出翠微倦卽林下宿人畏狂生狂我避俗
人俗愛我君獨真招我來不速詩龕近西涯舊址有懷麓湖上
每縱遊鷗鷺往來熟看花上漁船踏月訪僧屋夜夜衝泥歸嘲
罵到僮僕連日阻清興枯坐若幽谷雷雨入寸楮其聲雜歌哭
中歲百念灰文字好猶篤終嫌秋意多春氣苦不足不如誦君
詩閉門看深綠但以雲水光貯此空洞腹

再答梧門兼示謝薌泉楊蓉裳張船山諸子

我詩不工君獨愛我性雖僻君不憎贈言游戲亦沉痛一笑翻

遺淚濕膺十丈蓮花秋月色此語妙絕吾未能但以踈狂極詆
斥哀哉下士聲蒼蠅吾儕樹立要千載紛紛毀譽安足憑韓蘇
命坐磨蝎宮甚至蜚語來廬陵何況文章特小技主奴出入徒
相凌眼前同調不數子謝公驚若霜天鷹老船跌宕才叔雅謗
書亦與名相乘君才所著定不朽卽論文獻尤可徵翰林五入
進復黜一官冷於退院僧我生四十百無就卽至蓋棺何足稱
才華中歲并刊落憂患早年多創徽連日空齋坐雷雨西山隔
墻喚不磨感君真氣發狂詠積憤一銷如解癥盤空硬語頗自
喜崖松偃雪纏枯藤温厚由來本善教風骨豈在多氣矜願除
肝肺槎枿盡只養襟懷空水澄匡廬佳處世稀有松翠作濤潭
瀑水一庵暝坐萬事足淨生富貴中燈

思元道人招同法梧門學士

薊泉楊蓉裳兩員外鮑覺

生中允徐星伯庶常小集

香蘇山館詩集卷六

八

道人爲我畫竹枝霜厓偃作蒼虬姿我詩有骨頗同瘦粉落却
憶秋深時道人賦我釵頭茗一飲能教千夢醒我詩有味苦不
濃綠雪甌深憐獨冷昨日爲君書知藤豈有健筆盤秋鷹風華
頗悔少年作以君所愛姑強膺妙聖何當貽百朋讀之汗下方
數升君抱玲瓏九仙骨況以慧香入禪悅一花一葉一如來千
潭千水千明月月與君心同妙明花與詩思同怒發我來移榻
臨西涯夜晴踏月雨看花踈狂自笑亦成癖寺墻村店皆塗鴉
梧門詩老勇無匹獨恃精兵挑怒敵旌旗十萬陣雲高拔幟不
容還趙壁雲中尺素忽見招雙鶴翩然翔九霄花前有月且同
醉枯腸何必搜無聊酒闌啜茗坐深綠更乞道人爲畫竹

萋香軒呈思元主人

冒雨看花有底急衣上湖雲曉猶濕主人招我開園扉一笑先
穿籬竹入換却青裳仍戴笠

竹陰一雨生午涼新筍別來如我長芭蕉葉亦青出墻幽花浥
吧吹異香尋花更繞了字廊紅闌卧水谿夕陽

夕陽忽下槐樹頂樹裏青帘漾風影喚酒逕思載孤艇溪邊蘆
葦聲蕭蕭隔水野鶴不可招閑步却隨人過橋

船山爲王竹嶼通守畫江聲帆影之閣屬余作歌

鍾山五色雲秦淮六朝月誰放江天如此寬蘆花萬頃吹成雪
雪外空烟無限青嵐氣漠漠天冥冥千峯盡頭一帆去恐是故
人別君處故人與君別十年舊遊飄若江上烟一閣依然俯江
水不見當年供奉船君家才名擅昆仲紀羣交誼吾尤重梅花
開時酒千甕醉墨潑雲天欲東謫仙一去騎長鯨君又孤飛作

香蘇山館詩鈔卷六

九

飢鳳葛帔相逢岐路間萬古青山醉一慟京師六月無怒雷車
聲日夜揚風埃水亭一角已足詫名勝安得寒濤萬里滾滾從
天來吾儕胸中百無有雲夢尙能吞八九風帆沙鳥忽飛迴一
剪江光落君手船山之畫蘭雪詩動搖一筆千山移願君讀詩
兼讀畫雲龍上下常相隨何必徑歸卧江閣翻令故人感離索
君不見山中宰相隨園翁聲華在日傾王公名山寂寞身後事
何況富貴如飄蓬小倉山與君家近頗聞猿鶴哀秋風卜鄰有
約未能踐千載相思圖畫中

題王子卿編修古香精舍看花懷人圖兼柬黃左田宮贊

圓照寺中老梅樹故人同賞三十年一聲翠羽幽夢斷却對冰
雪思癡仙昏鐘才定月高出病蕊未花枝更妍孤鶴三更踏踈
影哀蛩一徑吟寒烟直廬當日聽宮漏精舍可念依枯禪踪跡

雲泥暫修阻心情膠漆終纏綿風雨果踐對床約翰墨妙結多
生緣仙才如此豈易得逸事無多宜並傳我愛兩君古風義何
幸論交相後先竹林却憶後遊地笛聲欲斷斜陽天叢菊晚霜
燕市酒桃花春水秦淮船歡場回首但陳跡舊交雖在如秋蟬
浮生飄泊詎有涯江鄉大好歸無田且看秀句出寒餓莫將離
緒縈山川石谿有樹況手栽花時作客殊惘然乞身借隱計須
早林間把臂呼梅顛

重九前一日宿秋隱山房次韻法梧門學士

佳節隔宵賞燒燈看叢菊一榻近西山先借花下宿看菊不嫌
冷看山可醫俗况得兩佳士左右若修竹謂韓氏胸中秋十分
已餐水雲綠幽願吾始諧俊遊君更續山寺聽說詩此味甘於

肉學士舊有山寺說詩圖

香蘇山館古體詩鈔卷六

十

五更由太平莊至翠微山寺

開門星在樹就道霜滿衣籠燭十餘里村犬吠尚稀碌碌入山
徑稍稍收林霏遙辨寺邊塔遂扣松下扉繞屋楓相多其大皆
十圍絳葉爛於錦遠近明朝曦庭蕉愛新長砌花亦相依託根
避塵盞晚節猶芳菲吾生不百年苦爲身名鞿素心幸與偕佳
賞焉能違緬懷杜樊川新詩吟翠微此遊踐夙諾風流庶可希
縱目得遐覽冥心契元機何必效牛山俯仰增歛歔

三山庵次韵梧門學士兼寄陶琴垞明府

賞秋負前約名山勞寤寐積逋今一償吟策喜先墜腰脚幸未
衰筇屐不求備選勝及蕭辰離塵得初地來經蘋果莊近較潭
柘寺鐘磬無凡音竹石有幽意曉霜重於雨晴嵐濕逾翠惜哉
東籬人不共西山醉五字君苦吟萬緣我甘棄尋花旣蕭散入

山更深至寺僧驚早來花陰鶴猶睡

隱寂寺

背山尋寺路轉僻一院青苔少人跡銀杏兩株古誰植蔽日吟
風太蕭瑟其根落葉深徑尺鬼斧千尋削丹壁雲縫坼開天一
隙澗花枯死但荒石我行磴底穿樹出大笑却踏蒼龍脊下有
古井湛寒碧洞中之天真隱寂

龍泉庵聽泉

寺門亭午殊蕭森龍氣所結雲爲陰不知泉脉出何處潭水一
碧無古今人間苦旱仰神惠山根滴雪成甘露文魚五色豈靈
種我來拊檻觀浮沉竹鞭穿地松插天鱗甲隱現疑可尋谿風
響答萬籟合不雨亦作蒼龍吟此山石奇樹尤古惜少瀑布飛
遙岑寺樓倚山山臥水遂以衆影爲幽深筆琶平日厭繁會風
泉一聽生道心諸天原是空明相下界誰聞微妙音

香蘇山館品題詩鈔卷六

十一

香界寺次韻梧門學士

靈鷲傳飛來蓬萊割左股天人講經地羣龍首皆附中峯勢特
尊名賢跡堪數曠奧妙能兼淺深隨所取高嶺疑石帆平湖想
烟艣遙看征鳥還近可孤松撫餘采或成虹空翠亦爲雨滄茗
得佳泉尋菊入荒圃回望寺後山微雲自吞吐坐久齋鐘聞斜
陽下西廡

寺前望海淀諸山及盧溝橋

界在香山南迤邐若平坡其地乃峻絕樓觀俱戢戢憑闌眺九
州積氣連山河昆明水一盂玉泉小於螺隱隱蘆溝橋日夕車
塵多貴賤各有營翩若燈上蛾大悲生悟中觀世涕滂沱不知
攬率天視我當如何

寶珠洞爲翠微最高處山徑險絕循崖而上獨至其巔

寺前天沱寥寺後山龍崕幽尋未厭深曠觀尙嫌壅懸厓儼削
鐵仄徑敢移踵藤蔓攀苦高石根危欲動得樹猿臂伸望雲鶴
身聳遂極千仞遊下見萬山拱疊翠爲奔濤其氣與雲湧渾河
天外流夕照如潑汞同遊到或稀異境佛所寵筋力豈不勞孤
造恃神勇

上山如梯空下山如縋城投身黃葉堆墜若浮雲輕撥雲尋古
洞窅默惟松聲中有金粟相枯坐萬劫平洞天無旦暮洞卉無
枯榮不聞不見中乃現大光明入洞復出洞我意但孤行學道
持定力息機觀衆生無心險亦夷有志堅乃成閉關願投老先
與茲山盟

半幅精舍看月聞笛聲甚美

香林山館古體詩鈔卷六

七

樵歌直下翠微頂清磬隔林山寺暝一逕夕陽踏人影歸雲下
山如晚潮拄杖我同雲過橋紅葉滿樹風蕭蕭

洞雲未歸月先起夜色空明已如洗月華有露兼有霜月氣非
煙亦非水千峯萬壑不見底我但聽泉坐山背謾謾松風吹醉
耳

三更月落山暗碧繁星隱樹雲潑墨中峯有客倚橫笛吹入霜
天裂崖石一聲鶴唳秋山空紫裘進士豈再逢乞詩來就東坡
翁

是夜四更驟雨坐待曉晴而歸次梧門韵留別寺僧

尋秋夢已深徘徊入谿樹水聲瀉虛檐眼花拭昏霧一夕陰晴
兼新遊亦奇遇踏月或孤往聽雨卻同趣榻擬詩龕移寺借寒
山住曉鐘催客還天青白雲互小別殊仙塵浮生足憂怖題名

崖竹枝願乞天龍護

讀梧桐學士寶珠洞詩次韵書後

老樹如龍怒穿壁下有蒼藤絡奇石騰身直上第一峯萬里秋
霄掃寒碧半空誰擲蓮花來山勢欲捲河聲回生天有願必到
此自崖而返徒低徊先生詩若洞天邃邀我入林容把臂硬語
公然壓孟韓大海蒼茫擘金翅筆墨所化爲煙雲真宰上訴諸
天聞優曇一現世希有狂花敗葉徒紛紛探奇我欲徧岩洞明
月催人白雲送只將瘦句寫幽深豈有雄篇愜飛動瓣香且喜
佛同龕苦笋回甘味漸請以詩禪偕菊隱何如雪北與香南

初十日同梧桐先生自西山歸邀集李北溟學士恰受航

看菊次梧桐看月韵奉答兼示周希甫太守楊蓉裳員

外陶琴垞明府陳石士編修

香蘇山館古體詩鈔卷六

三

明月未圓花正好萬事不如達觀早愛月同倚西山樓愛花同
賞東籬秋放眼天須絕頂痛飲花前不求醒昨日天上今人
間惜有花月無谿山衣上白雲濕於雨醉中搖筆花能舞笛聲
豈待山陽吹身世蒼茫生酒悲蓬萊失脚墮塵海憂患十年此
身在故人萬里風吹來謂希甫且對菊花懷抱開霜月可憐好顏
色照我看花帽檐側金門宦隱皆浮家西山何必非西涯吾生
不願死章句月地花天醉千度

喜晤周希甫太守

薊門望黔中征鴻太迢遞安得萬里風吹君天外至喜極握君
手一笑乃成涕離別豈足哀萬感迫中歲君早收盛名我亦負
奇氣瓣香因藏鬪車笠高義傲居泥比鄰稍暇輒相詣贈詩
寫纏綿老蒼出新麗同時王紹諫弱性情交最摯李介詩特精

悍羅兩峯畫頗風致俯仰二十年俊遊如隔世三君皆九原存者

復憔悴花開積水潭踏雨入秋寺追念平昔歡安得不沈醉聞

君辭中書出爲大州吏崎嶇戎馬間歌聲雜饒吹積勞遷一官

領郡百蠻地其水多苦鹹其山多瘴癘士風化淳朴民力拯凋

敝清貧固所甘心亦云瘁自言官事冗久矣唱酬廢幸有賢

公子剩稿出行笥攬勝多名篇懷古寓深喟始知簡要人蓄深

發逾銳我嗟嚮道晚苦吟亦偏嗜浮沉憂患中其語皆夢嚙前

年客揚州二豎苦爲祟自定平生文已託身後事枕上秋懷詩

一淚成一字感激多天真狂愚觸時忌中聲知未諧痛定欲焚

棄持示王鐵夫謂得冰霜味危言多自懲聞者亦無對遂以過

而存並用誌吾悔今年罷春官閉門孰睡小蹟無成心奇災

幾滅鼻四月廿一日事生死益達觀湖山恣游戲博士署新銜蓮花有

香齋山館古體詩鈔卷六

古

仙意余用陸放翁詩昨聞西山招赴若秋鷹鷲攀藤陟千仞洞

天極幽邃歸來展重陽邀君把吟袂嶺雲尙隨身濛濛落空翠

百年塵海深浮名適爲累好山與故人何可失交臂願君理吟

髻前棕歡未墜燒燈對籬花同君續遊記

題陶季壽野服小像

松聲吹作雨天風與泠泠石氣結爲雲崖壑同一青瀑布雲際

來觸石爲雷霆奔流下人間爲瀟湘洞庭中有騷客魂萬古秋

常醒君實生其鄉束髮誦遺經餐菊衣薜荔骨味皆芳馨何年

墮塵海一官如梗萍坐令屈宋流手版趨頭廳我才不及君山

澤甘沉冥天塞吟瘦詩只許孤鶴聽與君爲兄弟相依如影形

唱酬日以密風義心所銘感君彈古瑟哀怨來湘靈持此畫一

卷讀之淚雙零君壯及世用我衰鬢先星寶此一日養豈願帶

萬釘飢寒迫我出負米同伶仃冷官幸無事讀書拾秋螢且尋
文字飲謝彼梁肉腥故山松石多其下有茯苓會當荷鋤歸求
以制頽齡衡岳與匡廬誅茅結雪亭扁舟待君來花時門未扃

奚鐵生山水橫卷爲蘇璞園御史題

鐵生不見已十載一杖徑爲泉下游好山幾筆青入畫故人淚
落西湖秋君與鐵生未相識愛生風格能見求身前傲骨拄蒼
岳死後逸氣凌滄洲自言此卷妙無匹藝林價合千金酬君詩
與畫信雙絕願以佳境供冥搜霜天攜酒菊圍寺谿聲到枕山
入樓歸磨凍墨題卷尾細看畫理銷羈愁白雲缺處有茅屋黃
葉村前誰釣舟一官雞肋太無味二頃鶴田難預謀閉門連日
雨中卧有夢只隨沙上鷗冬花舊宅念猶在買山安得居杭州

